

## REGLUGERÐ

### fyrir Íslenzkar Getraunir.

#### 1. gr.

Íslenzkar Getraunir eru félag, sem stofnað er til að afla fjár til stuðnings íþróttaiðkunum á vegum áhugamanna um íþróttir á Íslandi í félögum innan Ungmennafélags Íslands og Íþróttasambands Íslands.

Heimili félagsins, aðalskrifstofa og varnarþing er í Reykjavík.

#### 2. gr.

Menntamálaráðuneytið skipar stjórn Íslenzkra Getrauna. Stjórnin er skipuð fimm mönnum, einum fulltrúa tilnefndum af eftirtöldum aðiljum:

Íþróttanefnd ríkisins,

Stjórn Ungmennafélags Íslands (U.M.F.Í),

Framkvæmdastjórn Íþróttasambands Íslands (Í.S.Í.),

Stjórn Knattspyrnusambands Íslands (K.S.Í.),

Framkvæmdastjórn Íþróttabandalags Reykjavíkur (Í.B.R.).

Varamenn skulu skipaðir á sama hátt. Stjórnin kys sér sjálf formann og skiptir að öðru leyti með sér verkum.

Starfstími stjórnarmanna og varamanna er þrjú ár. Fulltrúi Íþróttanefndar ríkisins kveður stjórnina til fyrsta fundar.

Þóknun stjórnarmanna ákveður Menntamálaráðuneytið og greiðist hún af Íslenzkum Getraunum.

#### 3. gr.

Stjórn Íslenzkra Getrauna fer með yfirstjórn félagsins og hefur á hendi reikningshald þess eða felur það framkvæmdastjóra. Stjórn Íslenzkra Getrauna ræður framkvæmastjóra og annað starfsfólk og setur því erindisbréf. Stjórnin skal færa ákvarðanir, er félagið varðar, inn í gerðabók.

#### 4. gr.

Reikningsár Íslenzkra Getrauna er frá 1. júlí til 30. júní.

Reikningar félagsins skulu endurskoðaðir af Ríkisendurskoðuninni. Ársreikning, ásamt ársskýrslu, skal senda Dómsmálaráðuneytinu og Menntamálaráðuneytinu.

#### 5. gr.

Í októbermánuði ár hvert skal stjórnin boða til fundar, þar sem hún skýrir frá rekstri og hag félagsins fyrir reikningsárið næsta á undan.

Rétt til setu á fundi þessum hafa, auk stjórnar og framkvæmdastjóra Íslenzkra Getrauna, formenn, eða varamenn þeirra, Íþróttanefndar ríkisins, Ungmennafélags Íslands, Íþróttasambands Íslands, Knattspyrnusambands Íslands og Íþróttabandalags Reykjavíkur. Einnig skal eftirlitsmaður, sbr. 14. gr., hafa rétt til að sitja fundinn.

#### 6. gr.

Íslenzkar Getraunir starfrækja getraunir, en með getraunum er átt við, að á þar til gerða miða — getraunaseðla —, sem félagið eitt hefur rétt til þess að gefa út og selja, eru merkt úrslit kappleikja (íþróttagetraunir).

#### 7. gr.

Stjórn Íslenzkra Getrauna ákveður fjölda getraunavíkna (leikvíkna). Getraunavíka telst frá laugardegi til föstudags.

**8. gr.**

Getraunin miðar að því að geta rétt til um úrslit í 12 kappleikjum, sem á getraunaseðli vikunnar eru, og skal tilgátan kveða á um sigur annars hvors liðsins, eða jafntefli þeirra. Getraunin er því aðeins gild, að notaður sé prentaður getraunaseðill, sem gefinn er út af Íslenskum Getraunum og gildir fyrir hlutaðeigandi getraunaviku.

Á seðilinn er prentað númer getraunavikunnar og hvenær viðkomandi kappleikir fara fram. Getraunaseðlar í hverri viku skulu tölusettir í óslitinni töluröð. Á seðilinn vinstra megin eru prentaðir 12 knattspyrnuleikir, en hægra megin einn dálkur, þrískiptur.

Hver getraunaseðill skiptist í 3 hluta, hluta 1, hluta 2 og stofn. Hluti 1 er sá hluti getraunaseðilisins, sem sker úr um, hvers getið er, sé ekki getið eins á öllum hlutum getraunaseðilsins. Hluti 2 er vinnuseðill Íslenzkra Getrauna. Stofninn varðveitir þátttakandi. Á hluta 1 skal skrifa greinilega nafn og heimilisfang þátttakanda.

**9. gr.**

Stjórn Íslenzkra Getrauna er heimilt að ákveða að getraunaseðillinn verði í 2 hlutum, þannig að hluti 1 verði bæði vinnuseðill Íslenzkra Getrauna og sá hluti, sem sker úr um, hvers getið sé. Mun þá verða tekin mynd af hluta 1, sem varðveitt verður hjá eftirlitsmanni. Einnig skal stjórn Íslenzkra Getrauna heimilt að gefa út seðla með fleiri en einni röð af leikjum, svo og seðla, þar sem úrslita leikja verður getið á annan hátt.

**10. gr.**

Við getraunina eru notuð merkin 1, x og 2.

Merkin eru notuð eins og hér segir: Sigur þess félags, sem fyrr er nefnt, skal merkja með því að skrifa töluna 1 í þann reit, sem hefur yfirskriftina 1, jafntefli skal merkja með því að setja x í þann reit, sem hefur yfirskriftina x og sigur þess félags, sem síðar er nefnt, skal merkja með því að skrifa töluna 2 í þann reit, sem hefur yfirskriftina 2. Alla hluta seðilsins skal fylla út eins, og skal seðillinn greinilega útfylltur.

Ef hluti 1 er fylltur út á annan hátt en hluti 2, skal útfylling á hluta 1 ráða.

**11. gr.**

Stjórn Íslenzkra Getrauna ákveður, hverjum veitist söluumboð, og kveður á um sölulaun.

Ungmenna- og íþróttafélög eða samtök þeirra skulu ganga fyrir um veitingu söluumboða innan íþróttahéraðs síns. Gerður skal samningur við handhafa söluumboðs.

Dreifing getraunaseðlanna skal fyrst og fremst falin hinum ýmsu ungmenna- og íþróttafélögum í landinu og samtökum þeirra.

Greiða skal stjórn héraðssambands 3% af heildarsölu í viðkomandi íþróttahéraði, enda staðfesti hún félagslega aðild umboðsaðila að samtökum sínum í íþróttahéraðinu.

Þau félög eða félagasamtök, sem taka að sér umboð fyrir Íslenzkar Getraunir, skulu senda uppgjör til aðalskrifstofu félagsins og skulu þau hafa borizt eigi síðar en kl. 12 á hádegis laugardaginn í upphafi leikviku.

Umboðsmaður skal afhenda seðilhluta 1 og 2 í einu lagi. Nú verður ákveðið, að getraunaseðill verði aðeins í 2 hlutum, skal þá aðeins afhenda hluta 1. Við getraun gilda einungis þeir seðlar, sem berast aðalskrifstofu félagsins, áður en nokkur leikjanna á getraunaseðlinum hefst, í síðasta lagi þó fyrir kl. 12 á hádegis laugardaginn í upphafi leikviku.

Á getraunaseðilinn er aðeins heimilt að setja eitt merki við hvern kappleik. Sé merkin fleiri, skulu þeir leikir, sem fleiri merki eru skráð við, ekki taldir með. Sé getraunamerki sett í rangan reit, sker reiturinn úr um hvers getið er, en ekki merkið. Félaginu er heimilt að úrskurða, að getraunaseðill, sem ekki er útfylltur í samræmi við reglur þessar, skuli vera ógildur. Úrskurði þessum má skjóta til eftirlitsmanns og er kærufrestur sá, sem getið er á getraunaseðlinum.

Útfylling getraunaseðils er algerlega á ábyrgð þátttakanda. Eftir að getraunaseðill hefur borizt Íslenskum Getraunum, er hann eign félagsins og verður hann ekki afhentur eða lánaður þátttakanda til breytinga eða leiðréttinga.

Nú glatazt seðill, sem afhentur hefur verið umboðsmanni ungmenna- eða íþróttafélags eða berst Íslenskum Getraunum of seint af einhverjum orsökum, svo sem vegna bruna, innbrota, samgöngutafa, eða af öðrum ástæðum, og á þátttakandi þá aðeins rétt á að fá þátttökugjaldið endurgreitt í formi nýs seðils.

Nú eyðileggst getraunaseðill, sem borizt hefur í tæka tíð til félagsins í bruna eða af einhverjum öðrum sambærilegum orsökum, sem ekki er hægt að saka félagið eða starfsmenn þess um og á eigandi seðilsins þá aðeins rétt á að fá andvirði seðilsins endurgreitt.

Íslenskar Getraunir hera ekki ábyrgð á tjóni, sem ungmenna- og íþróttafélög eða umboðsmenn þeirra kunna að valda þátttakanda með rangri meðferð getraunaseðils, seinlæti í afgreiðslu vikuuppgjörs eða af öðrum ástæðum.

Hver þátttakandi ber sjálfur það tap, sem orsakast kann af því, að hann hefur ekki fylgt ákvæðum í reglugerð þessari varðandi útfyllingu, meðferð og afhendingu getraunaseðils hans.

#### 12. gr.

Nú falla þrír eða fleiri kappleikir, sem á getraunaseðilinum eru, niður og skal þá einn úr stjórn Íslenskra Getrauna, að viðstöddum eftirlitsmanni, varpa blutkesti um úrslitin í þeim leikjum, og gilda þau merki, sem upp koma. Skal leit að vinningsseðlum ekki hafin, fyrr en að þessu loknu. Falli hins vegar færri leikir en þrír niður, þá gilda úrslit þeirra leikja, sem fram fóru.

Ákvæði 1. mgr. gildir þó ekki um leiki, sem færðir eru frá laugardegi til sunnudags. Er leikur er hafinn og honum hætt vegna óveðurs, þoku eða annarra óviðráðanlegra orsaka, þá gildir það sem úrslit, hvernig leikar standa, er leiknum var hætt. Þótt íþróttasamtök leiðrétti úrslit leiks eftir kæru, hefur það engin áhrif á getraunina.

Sé leikur framlengdur vegna jafnteflis eftir fullan leiktíma, gildir niðurstaðan að lokinni framlengingu.

#### 13. gr.

Verð hvernar getraunaraðar er kr. 25.00 — tuttugu og fimm krónur. —. Helmingi af heildarsöluverði raða eða miða skal varið til vinningsa.

Heildarupphæð vinningsa skiptist í 2 hluta og skiptast 70% hennar milli þeirra seðla, sem flestar réttar ágizkanir hafa, en 30% heildarvinningsupphæðarinnar skiptist milli þeirra seðla, sem næstflestar réttar ágizkanir hafa.

Sé einn seðill með flestar réttar ágizkanir, rennur öll upphæðin í 1. vinningsflokki til hans, en séu fleiri seðlar með flestar réttar ágizkanir, skiptist vinningsupphæðin í 1. vinningsflokki jafnt á milli þeirra. Allir vinningshlutar í 1. flokki lækka þannig, að þeir standi á kr. 500.00 eða kr. 1 000.00. Mismunurinn rennur í varasjóð.

Í 2. vinningsflokki skiptist vinningsupphæðin jafnt á milli þeirra, sem næstflestar réttar ágizkanir hafa. Verði vinningshluti í 2. vinningsflokki hærri en vinningshluti í 1. flokki, skulu vinningsflokkarnir sameinaðir og vinningshlutar vera jafnháir. Allir vinningshlutar í 2. vinningsflokki skulu lækka þannig, að þeir standi á heilu hundraði króna. Mismunurinn rennur í varasjóð.

Vinningar, sem ekki ná kr. 1 000.00, skulu ekki greiddir út. Ef vinningshlutar í 2. flokki ná ekki kr. 1 000.00, bætist vinningsfjárhæð 2. flokks við vinningsfjárhæð 1. flokks og skiptist heildarvinningsupphæð vikunnar þá milli seðla í 1. vinningsflokki. Nú nær vinningshluti í 1. flokki ekki kr. 1 000.00 og fellur þá greiðsla vinninga í þeirri viku niður, en vinningsupphæðinni skal þá bætt við heildarvinningsupphæð næstu getraunaviku á eftir.

#### 14. gr.

Dómsmálaráðuneytið skipar eftirlitsmann til þriggja ára í senn og skal hann gæta hagsmuna þátttakenda. Eftirlitsmanni skal heimilt að ráða starfsfólk til aðstoðar við eftirlitsstörf. Dómsmálaráðuneytið skipar einnig varamann eftirlitsmanns. Kostnaður við eftirlitið greiðist af Íslenskum Getraunum samkvæmt ákvörðun Dómsmálaráðuneytisins.

Hlutverk eftirlitsmanns er:

1. Að varðveita hluta 1 af getraunaseðlinum, eða mynd af hluta 1, sbr. 9. gr., frá því leikir hefjast og þar til kærufrestur er útrunninn.
2. Að staðfesta vinningaskrá hverju sinni.
3. Að úrskurða kærur, sem berast.
4. Að hafa eftirlit með að vinningar sé greiddir.

Eftirlitsmaður skal færa sérstaka gerðabók og skal skrá í hana vinningaskrá hverju sinni, svo og allar kærur og úrskurði.

#### 15. gr.

Íslenzkar Getraunir gefa út vinningaskrá fyrir hverja leikviku, staðfesta af eftirlitsmanninum. Í vinningaskrá, sem birta skal í dagblöðum, eru númer þeirra getraunaseðla, sem hlotið hafa vinning.

Heildarupphæð vinninga breytist ekki frá því, sem birt er í vinningaskrá, en einstakir vinningshlutar geta breytzt, ef kærur eru teknar til greina.

#### 16. gr.

Telji þátttakandi, að númer á getraunaseðli hans sé ekki birt í vinningaskrá, verður hann sjálfur að leggja fram kæru til að fá leiðréttingu. Kæran skal vera skrifleg á þar til gerðu eyðublaði. Eyðublöð fást hjá umboðsmönnum Íslenzkra Getrauna og á aðalskrifstofunni. Kærun skal senda til aðalskrifstofu Íslenzkra Getrauna og skulu hafa borizt þangað fyrir kl. 12 á hádegi á 21. degi frá dagsetningu vinningaskrárinnar. Kærufrests skal getið í vinningaskrá. Kærun, sem berast of seint, eða veita ekki fullnægjandi upplýsingar til kæruúrskurðar, er ekki skylt að taka til greina.

Eftirlitsmaður kveður upp fullnaðarúrskurð um kærur. Til grundvallar úrskurði skal leggja það, sem skráð er á seðilhluta 1. Félagið tilkynnir kæranda um úrskurð eftirlitsmanns.

#### 17. gr.

Að kærufresti liðnum skal greiða vinninga getraunavikunnar. Sé nafn og/eða heimilisfang eiganda getraunaseðils ekki skráð á hluta 1 á getraunaseðli, eða ógreinilega skráð, þá telst seðillinn nafnlaus. Falli vinningur á nafnlausan seðil, skal eigandi hans framvísa seðlinum við aðalskrifstofu Íslenzkra Getrauna, eða við þá peningastofnun, sem annast greiðslur vinninga fyrir félagið. Vinningar skulu greiddir með ávísunum til þátttakenda. Fáí vinningshafi ekki vinning sinn greiddan, skal hann tilkynna aðalskrifstofu það, og skal tilkynningin hafa borizt þangað innan þriggja mánaða frá dagsetningu vinningaskrár.

**18. gr.**

Í lok hvers reikningsárs skal birta í Lögbirtingablaði númer þeirra getraunaseðla, sem vinningar hafa fallið á, og eru þá ósóttir. Verði vinninga eigi vitjað samkv. þeirri auglýsingu innan mánaðar frá því að hún birtist, falla vinningarnir í varasjóð.

**19. gr.**

Vinningar getrauna eru undanþegnir hvers konar opinberum gjöldum öðrum en eignarskatti, á því ári, sem þeir falla til útborgunar.

**20. gr.**

Til kostnaðar við íþróttgetraunir telst greiðsla til Knattspyrnusambands Íslands (KSÍ), að lágmarki 250 þús. kr., en 15 þús. kr. af hverri milljón heildartekna yfir 20 millj. kr. allt að því að greiðslan nemur 475 þús. kr. á ári, og eftir að þeirri fjárhæð er náð, greiðist til KSÍ 7 500 kr. af hverri milljón.

Einnig telst til kostnaðar 0.5% greiðsla af heildarsölu í varasjóð, sem Íslenskar Getraunir eiga að nota til þess að mæta áföllum, sem félagið kann að verða fyrir.

**21. gr.**

Þegar greiddir hafa verið vinningar, sölulaun og kostnaður, skal ágóða af rekstri Íslenskra Getrauna skipt, sem hér segir:

Til Íþróttasjóðs 10%,

Til Ungmennafélags Íslands 20%,

Til Íþróttasambands Íslands 70%.

**22. gr.**

Öllum öðrum en Íslenskum Getraunum skal óheimilt að starfrækja getraunir, sem um ræðir í 2. gr. laga nr. 59 29. maí 1972, um getraunir. Enn fremur er óheimilt, án sérstakrar lagaheimildar, að starfrækja veðmálastarfsemi í sambandi við íþróttakeppni. Brot á þessum ákvæðum varða sektum allt að 100 þús. kr., sem greiðist í Íþróttasjóð.

**23. gr.**

Leggist starfræksla Íslenskra Getrauna niður, skulu eignir félagsins varðveitast hjá Íþróttanefnd ríkisins.

**24. gr.**

Reglugerð þessi, sem sett er samkv. heimild í lögum nr. 59 29. maí 1972, um getraunir, öðlast gildi 1. janúar 1973 og falla þá jafnframt úr gildi eldri ákvæði um getraunastarfsemi.

*Dóms- og kirkjumálaráðuneytið, 21. desember 1972.*

**Ólafur Jóhannesson.**

*Ólafur W. Stefánsson.*